



**Les Fleurs Des Vies Des Saints Et Des Festes De Toute
L'Annee, Suivant L'Usage Du Calendrier Romain Reforme**

Augmentees des Saints & Bien-heureux Peres Iesuites, de Saint Charles
Borromee, & de Sainte Françoise ; Avec le Martyrologe Romain, pour
tous les iours de l'Annee ...

Ribadeneyra, Pedro de

Paris, 1631

I La vie de saint Aubin, Euesque d'Angers.

[urn:nbn:de:hbz:466:1-75749](https://nbn-resolving.org/urn:nbn:de:hbz:466:1-75749)

^{1.}
MARS

gneur nous aime, qu'il luy a expressément enchargé nostre tutelle & protection. Est-ce pas donc vne grande folie de prester l'oreille à nostre ennemy mortel, & suiure les conseils de celuy qui n'a ioye qu'en nostre malheur, ny contentement qu'en nos peines & tourmens, de boucher les oreilles aux aduis & remonstrances d'un si cordial amy, qui pleure de nos fautes, se plaist en nos merites, & triomphe de nos victoires? Toutes & quantes fois qu'il se propose quelque bien à faire, ou à esquiver quelque mal, nous sentons ceste luitte & bataille spirituelle en nous-mesmes, car nostre ennemy veut destourner le bien, & nous porter au mal: au contraire le saint Ange nous retient & garde de tomber dans le precipice du mal, & nous excite aux œuvres vertueuses. Donc si nous ne sommes infensez & fols tout à fait, nous devons obeïr à nostre Ange Gardien, comme à vn tres-sage conseil, & à vn tres-fidel amy, pour se resjouir, & faire nostre profit, abhorrer & reiecter les suggestions de Sathan, afin de le facher, & nous deliurer de sa tyrânie, loüant nostre Seigneur de tous les autres bien-faits que nous auons receus de sa main tres-liberale, particulièrement pour celuy qu'il nous a fait des saints Anges: en ce faisant nous celebrerons la feste d'aujourd'huy, comme il est requis, à la gloire & exaltation de nostre Seigneur, & à l'honneur des saints Anges, & au profit de nos ames, & ferons participans de sa felicité, laquelle par l'intercession des mesmes Anges, nous vueille octroyer le Seigneur qui nous a créez pour elle.

LA VIE DE SAINT AVBIN
Euesque d'Angers.

Par M. A. du Val.



E bien-heureux saint Aubin, pourtraict de toute vertu, miroïer des Euesques, & l'ornement de la France, nasquit en Bretagne, au Diocèse de Vannes, de parens riches & nobles, & fit paroistre dès sa tendre ieunesse ce qu'un iour il deuoit estre. Car se retirant des legeretez pueriles, il s'adonna à la pieté, aimoit ceux qui luy faisoient du mal, & enduroit les iniures de ses compagnons, comme si c'eust esté de tres-grandes loüanges: il frequentoit les Eglises, prioit assiduëment, & cherchoit les lieux solitaires, pour se liurer entierement à Dieu, & vaquer à la contemplation des choses saintes: & voyant qu'il ne s'en pouuoit pas si librement acquiter dedans le monde, il se rendit Religieux, malgré ses parens, au Monastere de Cincilli, où nonobstant la noblesse & grandeur de sa race, il estoit le plus souple, prenant vn singulier plaisir aux actions viles & basses; & marrant sa chair pour l'assubjectir à l'esprit, par veilles, abstinences, oraisons, & autres manieres fort penibles. Dieu fit paroistre en son nouiciat vn traict de sa future sainte-

te. Car son Abbé luy ayant commandé d'aller dehors, il tomba vne si grosse & furieuse pluie, qu'elle creua le toict de la maison où il estoit logé, chacun trempant dans l'eau, excepté luy, demeurant au milieu de ces eaux, comme les trois enfans en la fournaise de Babylone: tous les hostes en furent estonnez, & commencerent à festimer vn saint.

A trente-cinq ans il fut esleu Abbé, & se gouerna si sagement l'espace de vingt-cinq ans qu'il le fut, que ioinant la grauité avec la modestie, la feuerité avec la douceur, la discipline reguliere fut parfaitement remise, & les Religieux entierement portez à leur deuoir. Dieu ne voulut pas qu'une telle lumiere fust plus long-temps cachée sous le boisseau: mais la voulut establir en vn lieu eminent, pour esclaire toute l'Eglise, tellement que la ville d'Angers estant despourueue de Pasteur, le Clergé & le peuple par vne inspiration du Ciel le demanderent pour Prelat: il y resista fort & ferme du commencement, mais voyant que c'estoit la volonté de Dieu, il baissa le col à ceste onereuse charge, laquelle, au lieu de l'enorgueillir comme plusieurs, embrasa son ame d'une telle frayeur, qu'il desfranca bien-tost les mauuaises coustumes du cœur de ses diocefains, & y en planta de bonnes, commençant lors à desployer les graces dont son ame durant sa solitude, auoit esté remplie. Les pecheurs se conuertissoient, les tiedes se reschauffoient, & les gens de bien se resoluoient à la perseuerance. Le fruit en fut si grand que la face d'Angers parut incontinent toute autre, & ne se contenoit pas de prescher seulement aux festes solempnelles, mais il s'employoit tous les iours, tantost en priuë, tantost en public, tenant pour vne indubitable maxime, que l'ame a besoin d'une pasture iournaliere aussi bien que le corps. Il auoit vn merueilleux soin des pauvres, afin que la paureté ne les fist oublier, & vsoit en ses aumosnes d'une telle prudence, qu'il nourrissoit tout à fait les malades & impuissans, & achetoit aux robustes ce qu'il falloit pour traouailler, de peur qu'ils ne croussent en oisueté, vraye mere de tous vices. Il visitoit les malades, consoloit les affligez, rachetoit les prisonniers, & soulageoit les veufues chargées d'un grand nombre d'enfans. Vne noble Dame, appellée Ethera, estant prisonniere par le commandement du Roy, entre les mains de soldats dissolus, le saint Prelat en eut pitie, s'en va à la prison, & l'en tire courageusement vn temeraire soldat luy voulut resister, en vomissant contre luy mille iniures, mais soufflant sur sa face, il tomba roide mort. Les autres n'osant resister, luy crierent mercy, & sachant que la captiuité de ceste Dame ne prouenoit que de ses debtes, il satisfit promptement aux creanciers, & la mit en repos. Il fit beaucoup d'autres miracles par le signe de la Croix, car il guarit à Angers Grata, qui estoit paralytique d'une main au bourg de Gegine, il resuscita Malabonde, ieune enfant, pour la compassion qu'il auoit de ses parens: & en diuers lieux il rendit la veüe à cinq aueugles, entre lesquels estoit vn Religieux

de Concilli. Plusieurs criminels estans emprisonnez en vne tour d'Angers, prierent le saint Prelat de les deliurer; le luge n'en voulant rien faire, il commença à dire que Dieu n'estoit pas si cruel, & qu'il s'y falloit plustost adresser; s'estans mis en prieres iusques à la nuit, vne grosse pierre tomba, qui fit ouuerture aux prisonniers, lesquels le vindrent remercier, protestans de ne retourner plus à leurs crimes. L'esprit malin possedoit vne femme, & s'estoit placé en son œil, & l'auoit étrangement enlé: apres luy auoir fait defence de l'endommager, il la coniuira quelque temps, le chassa, & deliura entierement la femme. On voulut enterrer vn sien seruiteur à Vannes, où il estoit mort, le saint Prelat desirant d'estre à ses funeraillles, il ne fut pas possible de remuer le corps iusqu'à ce qu'il fust arriué.

Ces miracles si frequents accompagnez de tant d'admirables vertus, porterent son nom en tous les endroits du Royaume, chacun le respectoit & se recoïmandoit à ses prieres, mesme le Roy Childibert, lequel alloit au deuant de luy lors qu'il le vouloit saluer; ce que le Sainct ne faisoit point que pour affaires de consequence: il se seruit de ce credit comme d'vn talent que Dieu luy auoit mis en main, de forte que voyant plusieurs abus en France, il procura pour les defraciner, le Concile, d'Orleans, où furent arrestez beaucoup de poincts fort necessaires, & entr'autres, la nullité des mariages entre parens, avec l'anatheme, contre ceux qui le contracteroient. Que les Iuifs qui se mocqueroient des ceremonies Chrestiennes, en la sepmaine Saincte, ne sortiroient de leurs maisons depuis le Teudy Sainct, iusques au Lundy de la feste de Pasques. Que les Prestres concubinaires seroient premierement excommuniez, & au cas qu'ils perseverassent, degradez & enfermez dedans vn Monastere. Beaucoup d'autres ordonnances, par son moyen furent faites en ce Concile, & les obserua si exactement, qu'il n'auoit aucun esgard à la qualité de personne, les grands ne luy estans non plus que les petits, ny les Princes dauantage que les autres. Les mariages entre parens luy firent plus de mal que le reste: les personnes y estoient naturellement acharnées, la coustume y estoit comme immemoriable, les Euesques y conuiuoiert, iusques-là qu'ils le forcerent nonobstant les Canons du Concile, d'absoudre vn Seigneur qu'il auoit excommunié pour ce regard, & voulurent qu'il luy enuoyast des Eulogies (c'estoient choses beniftes, que les Euesques enuoyoiert anciennement pour marque de benediction & bien-veillance.) Se voyant ainsi forcé, il declara hautemēt que Dieu s'en vengeroit, ce qui aduint: Car cēt excommunié mourut subitement auant que recevoir ces Eulogies, & nonobstant que Dieu eust fait paroistre ce grand miracle, pour monstrer la force de l'excommunication iettée par le Sainct, & en outre que la violence des Euesques contre iceluy, si est-ce qu'il eut crainte d'auoir esté trop mol, & de n'auoir pas assez resisté à la violence de ces Prelats; & s'achemina à Arles, pour en conferer avec l'Archeuesque Cefarius, qui estoit lors en vogue par

toute l'Eglise, mais principalement en France. L'histoire ne rapporte point quel aduis il luy donna, mais seulement que le regret & la tristesse l'emporta de ceste vie en l'aage de quatre-vingts ans, apres auoir heureusement regy son Euesché l'espace de vingt-six ans six mois, laissant vne eternelle memoire de ses vertus & vn extrême regret à tout son peuple. Son corps fut solemnellement enterré en vne Chappelle de l'Eglise de saint Maurille: depuis saint Germain Euesque de Paris, avec plusieurs autres delibera de le tirer de là pour le porter en vne Eglise erigée en son nom; & comme on ne pouuoit trouuer moyē de le tirer, trois pierres tomberent d'elles-mesmes, qui faciliterent le moyen de l'enleuer: alors avec les Hymnes & loüanges retentissantes de toutes parts, il fut porté en la nouvelle Eglise, où il repose encore à present. Trois Paralitiques furent gueris, & deux auugles illuminez en ceste Translation. Beaucoup d'Eglises de France ont esté erigées en son honneur, & grand nombre de villages appelez de son nom. Il viuoit du temps du Roy Childibert, l'an 1440. & non pas l'an 720. comme veut dire Tritemius. Sa vie a esté escrite par Fortunat Prestre, Gregoire de Tours, Vsuard & Beda en font vne honorable mention, comme aussi le Martyrologe Romain au premier iour de Mars.

A Rome decederent deux cens soixante martyrs condamnez pour le nom de nostre Sauueur, à tirer du sable hors de la porte du Sel, par sentence qu'en donna l'Empereur Claude, & puis vuez à coups de fleches dans l'amphiteatre par le commandement du mesme. Item les Sainctz martyrs Leon, Donat, Abondance, Niocephore, & autres neuf. A Marseille Sainct Adrian & Hermes martyrs. A Heliopoli sainte Eudocie martyre, laquelle durant la persecution de Traian, fut baptisée par vn prestre nommé Theodore, animée au Sainct combat, & puis decolée par le commandement du President Vincent. Item sainte Antonine, laquelle s'estant mocquée des faux dieux durant la persecution de Diocletian, fut enclouée dans vn certain vase, & plongée dans vn mers. A Verde en Flandres saint Suisbert, lequel ayant du temps du Pape Serge presché en Frise, Hollande, & autres quartiers de Flandres & Allemagne, conuertit plusieurs peuples à la Foy, & fait diuers miracles, mourut en sainte patx. Au Mans Sainct Suisar Abbé. A Angers Sainct Albin Euesque & Confesseur, homme de rare vertu & sainteté. A Perouse la translation de saint Herculan Euesque & martyr.

A Rome sur le chemin qui meine vers la champagne de Rome, trespasserent les Sainctz Ionin & Basilee qui endurent sous les Empereurs Valerien & Galien. Au mesme lieu plusieurs sainctz martyrs, lesquels sous l'Empereur Alexandre, & le gouverneur Vlpian, ayans esté long-temps tourmentez, furent condamnez d'auoir les testes tranchées. Sur le port de Rome decederent les Sainctz martyrs Paul, Secundille & Ianuier. A Cesarée ville de Capadoce les Sainctz Lucie Euesque, Absalon, & Lorgie. En la champagne d'Italie se fait la commemoration de quatre vingts martyrs, lesquels ne voulans manger de la chair qui auoit esté immolée aux idoles, ny adorer vne teste de cheure, furent tres-cruellement massacrez par les Lombards. A Rome mourut Sainct Simplicio Pape, successeur de Sainct Hilaire. En Angleterre Sainct Ceade Euesque de Kent, & Nortembeland, homme de grande sainteté. Le Venerable Beda a couché par escrit ses rares vertus.